

官常典第三百四十七卷

都察院部名臣列傳九

宋四 沈畸

按宋史本傳畸字德侔湖州德清人第進士歷官州縣崇寧中爲紆目前然使游手鼓鑄無故有倍
史畸至臺欲有所論建而六察無言事法乃詣匭上十事言花石擾民土木弊國冗費多恩澤濫議
論異同下情睽隔其論當十夾錫錢最爲剗當略曰小錢之便於民久矣古者軍興用之或以一當
百至於當十此權時之術非可行於無事之世今當十之議固足紓目前然使游手鼓鑄無故有倍
稱之息何憚而不爲雖日加斷斬勢不可止恐未能期歲東南小錢輕錢輕則物重物重則民愈困
此盜賊所由起也陝西舊無銅錢故以夾錫爲貴一切改鑄則由前日鐵錢耳今東南方私鑄又將
使西北效之是導民犯法也進殿中侍御史嘗經國子監門有小內侍從數騎絕道突過騶卒追問
不爲止臺檄諸司捕之不獲畸曰風憲之地可但已乎入言之徽宗下內省跡治竟抵罪蔡京興蘇
州錢獄欲陷章縱兄弟遣開封尹李孝壽御史張茂直鞫之株逮至千百強抑使承盜鑄罪死者甚

衆京猶以爲緩帝獨意其非辜遣畸及御史蕭服往代京將啖以顯仕白爲左正言及擢侍御史畸至蘇卽日決釋無佐証者七百人嘆曰爲天子耳目司而可傳會權要殺人以苟富貴乎遂閱實平反以聞京大怒削畸三秩貶監信州酒稅未幾卒旣而獄事竟復羈管明州使者持勅至家將發棺驗實畸子溶泣訴乃止建炎初贈龍圖閣直學士溶官至右正言

蕭服

按宋史本傳服字昭甫廬陵人第進士調望江令治以教化爲本訪古跡得王祥臥冰池孟宗哭笋臺皆爲築亭又刻唐縣令鞠信陵文於石碑民知所嚮已而邑人朱氏女割股愈母疾人頌傳之以爲治化所致知高安縣尉獲凶盜獄具矣服審其辭疑之且視其刀室不與刃合頃之而殺人者得囚蓋平民也徙知康州未行改親賢宅教授提舉淮西常平召爲將作少監以使事得入對論人主聽言之要以謂唐虞盛世猶畏巧言而望讒說纒纒數百言徽宗謂有爭臣風擢監察御史奉詔作崇寧備官記帝稱善詔輔臣曰服文辭勁麗宜居翰苑朕愛其鯁諤顧臺諫中何可闕此人俄偕沈畸使鞠獄坐羈管處州踰歲得歸張商英當國引爲吏部員外郎送遼使得疾於道遂致仕旣愈還

舊職以父老得請知蘄州卒年五十六

黃葆光

按宋史本傳葆光字元暉徽州黟人應舉不第以從使高麗得官試吏部銓第一賜進士出身由齊州司理參軍爲太學博士遷祕書省校書郎擢監察御史左司諫始涖職卽言三省吏猥多如遷補升轉奉入賞勞之類非元豐舊制者其大弊有十願一切革去徽宗卽命釐正之一時士論翕然而蔡京怒其異己密白帝請降御筆云當豐亨豫大之時爲衰亂減損之計徙葆光符寶郎省吏醵錢入寶籙宮作十道齋報上恩帝思其忠明年復拜侍御史遼人李良嗣來歸上平夷書規進用擢祕書丞葆光論其五不可大槩言良嗣凶黠忿鷙犯不赦之罪於鄰國逃命遁死妄作平夷等書萬一露泄爲患不細中祕圖書之府豈宜以罪人爲之宜厚其祿賜賔諸畿甸之外又言君尊如天臣卑如地剛健者君之德而其道不可屈柔順者臣之常而其分不可亢苟致屈以求合則是傷仁非所以馭下也苟矯亢以求伸則是犯分非所以尊君也帝感悟命近臣讀其奏於殿中自崇寧後增朝士兼局多葆光以爲言乃命蔡京裁定京陽請一切廢罷以激怒士大夫葆光言如禮制局詳議官

至七員檢討官至十六員製造局至三十餘員豈不能省去一二上副明天子之意時皆壯之政和末歲旱帝以爲念葆光上疏曰陛下德足以動天恩足以感人檢身治事常若不及而不能感召和氣臣所以不能無疑也蓋人君有屈己逮下之心而人臣無歸美報上之意者能致陰陽之變人君有慈惠惻怛之心而人臣無將順欽承之意者能致陰陽之變陛下恭儉敦朴以先天下而太師蔡京侈大過制非所以明君臣之分陛下以紹述爲心而京所行乃皆元豐之法彊悍自尊不肯上承德意太宰鄭居中少宰余深依違畏避不能任天下之責此天氣下而地不應大臣不能尙德以應陛下之所求者如此疏入不報且欲再上章京權勢震赫舉朝結舌葆光獨出力攻之京懼中以他事貶知昭州立山縣又使言官論其附會交結泄漏密語詔以章揭示朝堂安置昭州京致仕召爲職方員外郎改知處州州當方臘殘亂之後盡心牧養民列上其狀加直祕閣再任卒年五十八州人祠之葆光善論事會文切理不爲橫議所移時頗推重本出鄭居中門故極論蔡京無所顧然其他不能不迎時好方作神霄萬壽宮温州郭敦實泗州葉點皆坐是得罪葆光遂疏建昌軍陳并秀州蔡審岳州傅惟蕭祁門令葛長卿不卽奉行制書存留僧寺形勝佛像及決罰道流乞第行竄黜

遂悉坐停廢識者尤之

張克公

按宋史本傳克公字介仲潁昌陽翟人起進士大觀中爲監察御史遷殿中侍御史蔡京再相克公與中丞石公弼論其罪京罷克公徙起居舍人踰月進中書舍人改右諫議大夫京猶留京師會星文變克公復論之中其隱隱語在京傳京致仕張商英爲相與鄭居中不合克公由兵部侍郎拜御史中丞治堂吏訟歸曲商英且疏其罪十商英罷京復召銜克公弗置徽宗知之爲徙吏部尙書京欲以銓綜稽違中克公旣又擿其知貢舉事帝以爲所取得人不問也居吏部六年卒贈資政殿學士

毛注

按宋史本傳注字聖可衢州西安人舉進士知南陵高苑富陽三縣皆以治辦稱大觀中御史中丞吳執中薦爲御史詔賜對未及而執中罷注辭焉徽宗固命之旣見謂曰今士大夫方寡廉鮮恥而卿獨知義命故特召卿卽以爲主客員外郎俄擢殿中侍御史蔡京免相留京師注疏其擅持威福

動搖中外以葉夢得爲腹心交植黨與帝逐夢得而遷注侍御史遂極論京受孟翊妖姦之書與逆人張懷素游處引凶朋林摠置政府用所親宋喬年尹京其門人播傳咸謂陛下恩眷不衰行且復用於是論者相繼京遂致仕四年誓再見注又言臣累論蔡京罪積惡大天人交譴雖罷相致政猶怙恩恃寵偃居賜第以致上天威怒推原其咎實在於京考京之罪蓋不可以縷數陛下去黨碑以開自新之路京疾其異已而別爲防禁陛下頒明詔以來天下之言京惡其議已而重致於法以嚴刑峻罰脅持海內以美官重祿交結人心錢鈔屢更而商賈不行邊事數易而國力大匱聲焰所震中外憤疾宜早令去國消弭災咎奏上京始出居錢塘注復采當世之急務曰省邊事足財用收土心禁技巧大槩謂近年以來邊民僥倖苟得昔所入貢者今必城爲郡縣昔所羈縻者今盡納其土疆以內地金帛而事窮荒不可計之費今黔南已有處分如夔渝新邊宜在裁省運鹽昔主於漕計今移於他司常平昔積於外州今輸於都下經費安得不匱財貨何以轉移願詔有司悉講復元豐舊制湯之遭旱以士失職爲辭今學校養士蓋有常額額外之人不復可預教養歲貢之餘略無可進之地願留貢籍三分暫存科舉以待學外之士使無失職東南造作奇玩花石綱舟與後苑工徒

京城營繕並宜暫罷以抑末敦本凡此皆聖政之所當先人心悅則天意解矣注所論切於世務類此遷左諫議大夫張商英爲相言者攻之力注亦言其無大臣體然訖以與之交通罷提舉洞霄宮居家數歲卒建炎末追復諫議大夫

洪彥昇

按宋史本傳彥昇字仲達饒州樂平人登第調常熟尉奉母之官旣至前尉欲申期三月以規薦而中分奉入彥昇處僧舍卻奉不納如約始交印歷郴州判官簽書鎮東軍節度判官彥昇嘗辟廣西經略府或稱其材擢提舉常平御史中丞石公弼薦新提舉廣西學事辛義可御史及陞辭適與同日徽宗兩留之遂爲監察御史遷殿中侍御史彥昇孤立任言責閱五年論蔡京再居元宰假紹述之名一切更張敗壞先朝法度朋姦誤國公私困弊旣已上印而偃蹇都城上憑眷顧之恩中懷跋扈之志願早賜英斷遣之出京何執中緣潛邸之舊德薄位尊當軸處中殊不事事見利忘義唯貨殖是圖願解其機政以全晚節呂惠卿與張懷素厚善序其所注般若心經云我遇公爲黃石之師且張良師黃石之策爲漢祖定天下惠卿安得輒以爲比他如鄧洵仁蔡薨劉極李孝稱許光凝許

畿盛章李諲任熙明之流皆條撫其過一不爲回隱右僕射張商英與給事中劉嗣明爭曲直事下御史彥昇蔽罪商英商英去又累疏抨郭天信以談命進用交結竄斥因請禁士大夫毋語命術毋習釋教先是詔諸道監司具法令未備若未便於民者久而弗上彥昇言吏狃於勢隨時俯仰不能上承德音因緣爲姦者衆有因追科而欲害熙寧保伍之法因身丁而故搖崇寧學校之政省事原情當有勸沮宜遣官編彙辨其邪正以行賞罰皆從之遷給事中嘗謁告一日而張商英復官之旨經門下言者以爲顧避封駁出知滁州尋加右文殿修撰進徽猷閣待制知吉州久之知潭州未行卒年六十三贈大中大夫

陳過庭

按宋史本傳過庭字賓玉越州山陰人中進士第爲館陶主簿澶州教授知中牟縣除國子博士何執中侯蒙器其才薦之擢祠部吏部右司員外郎使契丹過庭初名揚庭辭曰徽宗改賜今名時人或傳契丹主苦風痺又箭損一目過庭歸證其妄且勸帝以邊備爲念遷太常少卿起居舍人宣和二年進中書舍人纔七日遷禮部侍郎未盡一月又遷御史中丞兼侍讀睦寇竊發過庭言致寇者

蔡京養寇者王黼竄二人則寇自平又朱勔父子本刑餘小人交結權近竊取名器罪惡盈積宜昭正典刑以謝天下由是大與權貴迂讎陷以不舉劾之罪罷知蘄州未半道責海州團練副使黃州安置三年得自便欽宗立以集英殿修撰起知潭州未行以兵部侍郎召在道除中丞初入見帝諭以國家多難每事當悉意盡言於是節度使范訥丐歸環衛過庭因言自崇寧以來建旄鉞者多不由勲績請除宗室及將帥立功者餘並如訥例又乞辨宣仁后誣謗姚古擁兵不援太原陳其可斬之罪七竄諸嶺表進禮部尚書擢右丞中書侍郎議遣大臣割兩河與金耿南仲以老聶昌以親辭過庭曰主憂臣辱願効死帝爲揮涕歎息固遣南仲昌及城陷過庭亦以金人拘之軍中因留不得還建炎四年卒於燕山年六十贈開府儀同三司諡曰忠肅

陸蘊

按宋史本傳蘊字敦信福州候官人少知名登進士第爲太學春秋博士經廢員省改國朝會要所檢閱文字崇寧中提舉河北兩浙學事召對言元祐異意俗學旣不爲我用近詔不以使一路而猶得爲守令臣愚未知其可遂拜禮部員外郎轉吏部遷辟雍司業太常少卿議原廟不合黜知瑞金

縣還爲太常進國子祭酒中書舍人請葺諸州天慶觀立學事司考課法遷大司成擢御史中丞引門下侍郎余深親嫌自列徽宗曰相避之法防有司不能盡公爾侍從吾所信任豈得下同庶僚乎不許蘊頗論事嘗言御筆一日數下而前後相違非所以重命令輔相大臣宦官戚里賜第營築縱撤民居縣官市財於民而不予直貴游子弟以從官領閑局奉朝請爲員猥多無益於事又賜予過制中外用度多於賦入數幸私室乖尊卑之分亦非臣下之福其言皆中時病以龍圖閣待制知福州改建州時弟藻由列曹侍郎出爲泉州過蘊合樂燕款閩人以爲盛事加顯謨閣直學士引疾提舉鴻慶宮方二浙用兵旁郡皆繕治守備蘊聞命就道使者劾爲避事奪職稍復集英殿修撰卒

虞奕

按宋史虞策傳策弟奕字純臣第進士崇寧提舉河北西路常平洛相饑徙之東路入對徽宗問行期對曰臣退卽行流民不以時還則來歲耕桑皆廢矣帝悅旣而西部盜起復徙提點刑獄時朝廷將遣兵逐捕奕條上方略請罷勿用而自計討賊不閱月可定轉運使張搏以爲不可宰相主博策數月不效卒用奕議悉降之擢監察御史親祭北郊燕人趙良嗣爲祕書丞侍祠奕白其長曰今親

衛不用三路人而良嗣以外國降子顧得預祠事可乎長用其言具以請不報陽武民傭於富家其室美富子欲私之弗得怒殺之而賂其夫使勿言事覺府縣及大理鬻獄突受詔鞫訊皆伏辜坐漏泄語言罷去再踰年還故職提點河北刑獄自何承矩創邊地爲塘灤有定界旣中貴人典領以屯田開拓爲功肆侵民田民上訴屢出使者按治皆不敢與直突曲折上之疏其五不可詔罷屯田加直祕閣淮南轉運副使入爲開封少尹故時大理開封治獄得請實蔽罪其後率任情棄法法益不用突言廷尉持天下平京師諸夏本法且不行何以示萬國請自今非情法實不相當毋得輒請從之遷光祿卿戶部侍郎睦州亂以龍圖閣直學士知鎮江府寇平論勞增兩秩還爲戶部內侍總領內藏予奪顯已視戶部如僚屬度支郎方討理滯奉中旨令開封尹與總領者來突白宰相曰計臣不才當去之而易能者不可使他人侵其官卽自劾不稱職詔爲罷內侍而徙突工部襲慶守張灤使郡人詣闕請登封東平守王靚諫以京東歲凶多盜不當請封爲政者不悅將罪靚突言靚憂民愛君所當獎激奈何用爲罪乎靚獲免未幾卒年六十贈龍圖閣學士

郭知章

按宋史本傳知章字明叔吉州龍泉人第進士從劉彝廣西幕府知浮梁分寧縣黃履薦爲御史以憂不克拜知海州濮州提點梓州路刑獄復以鄭雍顧臨薦爲監察御史哲宗親政上書請用淳化天禧詔增諫官員曰館職無所用朝廷設之不疑諫官最急乃常不足是急於所無用緩其所當急也又比歲選授監司多繇寺監丞不過知縣資序外官莫重於部使者豈宜輕用若是宜稍限以節如轉運判官擇實任通判者提點刑獄擇實任郡首者然後攷其治理簡拔用之又言自大河東北分流生靈被害今水之趨東者已不可遏順而導之閉北而行東其利百倍矣遷殿中侍御史言先帝辟地進壤建策四砦據高臨下扼西戎咽喉元祐用事者委而棄之願討曠議奏顯行黜罰史院究神宗實錄誣罔事知章請貶治呂大防等紹聖復制科知章校試言先朝旣策進士卽廢此科近年復置誠無所補遂復罷又請復元豐役法大抵迎合時好進左司員外郎改左司諫嘗言爵祿慶賞以勸天下之善願無以假借大臣使行私恩刑罰誅戮以懲天下之惡願無以假借大臣使快私忿忠於陛下者必見忌大臣黨於大臣者必上負陛下惟明主裁察權工部侍郎爲中書舍人遼使蕭德崇來爲夏人請還河西地命知章報聘德崇曰兩國久通好小國蕞爾疆土還之可乎知章曰

夏人累犯邊法當致討以北朝勸和之故務爲優容彼若恭順如初當自有恩旨非使人所能預知也歸未至坐營主導河東流議以集賢殿修撰知和州徽宗立曾布用爲工部侍郎加寶文閣直學士知太原府召拜刑部尙書知開封府爲翰林學士言者又論河事罷知鄧州旋入黨籍數年復顯謨閣直學士政和初卒

吳執中

按宋史本傳執中字子權建州松溪人登嘉祐進士第歷官州縣同門壻呂惠卿方貴盛不肯附以取進凡三十餘年始提舉河南常平連徙河東淮南江東轉運判官提點廣東刑獄入爲庫部吏部右司郎中大觀初擢兵部侍郎二年進御史中丞論開封府內侍省京畿秦鳳違法干請詔獎其得風憲體又言開封之治事大理之決獄將作之營繕權貨之入中皆職所當爲乃妄以爲功一歲遷官至五六宜行抑損遂詔自今但賜東帛鄭居中知樞密院執中言外戚不宜在政地帝還其章而諭所以用居中之意初蔡京忌張康國故引執中居言路執中先劾劉炳兄弟宋喬年父子皆京客也帝嘗語執政嘉其不阿康國曰是乃爲逐臣地耳已而章果至帝怒黜知滁州未幾徙越州石公

弼以爲執中反復得罪未宜殿大府改提舉洞霄宮以集賢殿修撰知揚州加顯謨閣待制知河南府道過都復拜中丞帝以星變逐蔡京言者未已執中謂進退大臣當全禮貌於是爲京下詔京得不重貶龐恭孫趙遘開梓夔諸夷州執中乞正其罪又言八行之舉所得皆鄉曲常人不足以爲士願下太學攷其道藝而進退之所論多施行遷禮部尙書張商英罷御史張克公言執中與商英皆由郭天信以進除樞密直學士知越州尋降待制又奪職卒於家

許景衡

按宋史本傳景衡字少伊温州瑞安人登元祐九年進士第宣和六年召爲監察御史遷殿中侍御史是時王黼蔡攸用事景衡言尙書省比闕長官而同知樞密院亦久闕雖三公通治三省然文昌政事之本樞密本兵之地各有攸屬安可久虛其位願博採公議遴選忠賢以補政府之闕遂大忤黼意朝廷用童貫爲河東北宣撫使將北伐景衡論其貪糺不可用者數十事不報睦寇平江浙郡縣殘燬而茶鹽比較之法如故景衡奏茶鹽之法當以食之衆寡爲歲額之高下今收復之後戶版半耗民力蕭然而茶鹽比較不減於昔民欲無困得乎奏上詔兩浙江東路權免茶鹽比較賊平日

仍舊朝廷既興燕雲之師調度不繼誅求益急景衡奏財力匱乏在節用民力困弊在恤民今不急之務若營繕諸役花石綱運其名不一吏員很多軍額冗濫又無名功賞非常賜予皆資緣僥倖干請無厭宜節以祖宗之制而省去之且極論和買和糴鹽法之害不報會知洋州吳巖夫以私書抵執政子道景衡之賢因從子壻符寶郎周離亨以達離亨繆以其書誤致王黼黼用是中景衡逐之欽宗卽位以左正言召旋改太常少卿兼太子諭德遷中書舍人侍御史李光正言程瑀以鯁亮忤執政斥景衡爲辨白坐落職予祠高宗卽位以給事中召旣至除御史中丞宗澤爲東京留守言者附黃潛善等多攻其短欲逐去之景衡奏曰臣自浙渡淮以至行在聞澤之爲尹威名政事卓然過人雖不識其人竊用歎慕臣以爲去冬京城內有赤心爲國如澤等數輩其禍變未至如是之酷今若較其小短不顧盡忠徇國之節則不恕己甚且開封宗廟社稷所在苟欲罷澤別遣留守不識縉紳中威名政事有加於澤者乎疏入上大悟封以示澤澤乃安杭州叛卒陳通作亂權浙西提刑趙叔近招降之請授以官景衡曰官吏無罪而受誅叛卒有罪而蒙賞賞罰倒置莫此爲甚卒奏罷之除尙書右丞有大政事必請問極論潛善伯彥以景衡異己共排沮之或言正二月之交乃太乙正

遷之日宜於禁中設壇望拜高宗以問景衡曰修德愛民天自降福何迎拜太乙之有初李綱議建都以關中爲上南陽次之建康爲下綱旣相遂主南陽之議景衡爲中丞奏南陽無險阻且密邇盜賊漕運不繼不若建康天險可據請定計巡幸潛善等傾綱使去南陽之議遂格至是諜報金人攻河陽汜水景衡又奏請南幸建康已而有詔還京罷景衡爲資政殿大學士提舉杭州洞霄宮至瓜州得暍疾及京口卒年五十七諡忠簡景衡得程頤之學志慮忠純議論不與時俯仰建炎初李綱議幸南陽宗澤請還京景衡乃請幸建康黃潛善等素惡其異已暨車駕駐揚州恍於傳聞不得已下還京之詔遂借渡江之議罪之斥逐而死旣沒高宗思之曰朕自卽位以來執政忠直遇事敢言惟許景衡詔賜景衡家温州官舍一區

蔣猷

按宋史本傳猷字仲遠潤州金壇縣人舉進士政和四年拜御史中丞兼侍讀有直聲嘗論士風浮薄廷臣伺人主意承宰執風旨向背以特立不回者爲愚共嗤笑之此風不可長輔臣奏事殿上雷同唱和略無所可否非論道獻替之禮內侍省不隸臺察竊元豐官制楊戩不當除節度使趙良嗣